

Usahawan empower ECER-MEKAR Lipis ceburi fertigasi pintar pertanian

Lipis: Majlis Pembangunan Wilayah Ekonomi Pantai Timur (ECERDC) dengan kerjasama UMP Advanced Education menganjurkan program lawatan ke tapak Projek Fertigasi Sayuran Kampung Keledek, di sini, baru-baru ini.

Projek itu membabitkan tanaman fertigasi pintar peserta Program Latihan Kemahiran dan Keusahawanan empower Wilayah Ekonomi Pantai Timur (ECER)-Memampankan Ekonomi Asas Rakyat (MEKAR).

Seramai 15 peserta terbabit dalam projek berkenaan dan mendapat tajaan penuh daripada Yayasan PETRONAS dan ECERDC bagi mengikuti program Latihan Kemahiran dan Keusahawanan empower ECER-MEKAR.

Usaha sama UMP Advanced sebagai penyedia perkhidmatan dan Pertubuhan Peladang Kawasan (PPK) Lipis sebagai penyedia latihan kepada peserta, menerapkan ilmu berkaitan pertanian dan membantu peserta menjadi usahawan yang lebih inovasi dan berdaya saing.

Ketua Pegawai Eksekutif UMP Advanced, Prof Madya Dr Mohd Rusliim Mohamed, berkata program itu bertujuan memberi hebahuan berkenaan impak pelaksanaan program latihan kemahiran dan keusahawanan empower ECER-MEKAR.

"Program ini berjaya melahirkan peserta yang mengusahakan projek tanaman fertigasi sayuran selepas tamat latihan enam bulan, sekali gus menjadi platform dan peluang kepada belia dan B40 menceburi bidang pertanian lebih sistematik.

"Perkembangan teknologi masa kini menghasilkan satu inovasi baharu dalam bidang pertanian di mana tanaman fertigasi pintar yang menggunakan *internet of thing* (IoT) bagi proses penjagaan tanaman mula mendapat perhatian ramai.

"Kini peserta di bawah bimbingan program empower ECER-MEKAR sendiri mengaplikasikan fertigasi pintar dalam pertanian yang diusahakannya.

"Program seperti ini amat berguna bagi membimbing dan me-



Penerangan dan demonstrasi kepada pihak Yayasan PETRONAS dan ECERDC di tapak Projek Fertigasi Sayuran Kampung Keledek, Lipis.

(Foto ihsan UMP Advanced)

ingkatkan kemahiran usahawan agar lebih kreatif dan inovatif dalam bidang diceburi," katanya.

Sementara itu, Pengurus Besar Bahagian Pembangunan Modal Insan ECERDC, Zulkifli Yaacob, berkata peserta harus mengambil peluang bagi mengubah taraf kehidupan sedia ada dengan menceburi bidang pertanian yang memberi pulangan berganda sekiranya diusahakan dengan cara yang betul.

"Melalui program ini peserta boleh mendapatkan khidmat bantuan dan nasihat melalui pelbagai agensi kerajaan seperti Jabatan Pertanian, Lembaga Pemasaran Pertanian Persekutuan (FAMA), Lembaga Pertubuhan Peladang dan sebagainya yang menyediakan pelbagai inisiatif

kepada petani," katanya.

Peserta empower ECER-MEKAR Lipis, Zulqarnain Ahmad Marzuki, 47 berkata dia sudah mengusahakan projek tanaman menggunakan sistem fertigasi pintar.

Katanya, sistem yang ingin dipasang di tapak projek fertigasi sudah lama diimpikan, namun akibat kekangan ilmu pengetahuan terpaksa ditangguhkan.

"Kini dengan bimbingan dan dorongan daripada UMP Advanced dan Pertubuhan Peladang Kawasan (PPK) impian saya menjadi kenyataan."

"Tanaman terung mini yang diusahakan di tanah pusaka berkeluasan setengah ekar menjadi titik permulaan untuk menjadi usahawan moden suatu hari nan-

ti," katanya.

Hadir sama, Penghulu Mukim Batu Yon 1, Mohd Sahlan Suran, Ketua Unit Operasi Yayasan PETRONAS, Tengku Noraida Tengku Mahmood, Pengerusi Ahli Jemaah Pengarah PPK Kuala Lipis, Datuk Zulkifli Othman, Ketua Jabatan Pembangunan Komuniti UMP Advanced Saharudin Ramli, Timbalan Pengurus Besar PPK Lipis, Mohamad Amran Embong dan Penolong Pegawai Pertanian, Juliah Sharif.

Pihak Yayasan PETRONAS dan ECERDC turut beramah mesra dengan peserta empower ECER-MEKAR yang sedang menjalani latihan bagi kursus seni bakeri dan pastri artisan di Pusat Latihan Kemahiran dan Keusahawanan empower ECER-MEKAR Lipis.